

Guck emol doo

Neilisch habb isch in de Kolonnade dess Kättche getroffe, wie se enn Korb voll Zeich geschleppt hott.

Ei, habb ich se gefroocht, wo issen de Schorsch, dass du disch su abschleppe musst? Ess Kättche hott de Korb uff oom von dene Betongklötz abgestellt, hott erst emol geschnauft unn donn ze Antwort gewwe: Hotters nitt verzählt, dass er jetzt koo Audo mehr fahrn derrf? Dess mett soim graue Star iss su schlimm worrn, der sieht joo nix mehr.

Isch saach: Wie hosden dess gemerkt, Kättche? Omm Stommdisch hotter immer die Aache zesommegekniiffe, awwer gesaat hotter nix.

Moonsde mir hädder was gesaat?, säts Kättche. Awwer isch habbs beim Audofahrn gemerkt. Hotter misch doch dauernd gefroocht: Guck emol hie, kimmt ooner von rechts? Kimmt ooner von links? Isch musst also alsfort gucke unn musst emm Bescheid gewwe. Awwer wie isch emol nix gesaat habb, hotter joo bald enn Radfahrer umgefahrn, unn doo habb ich gemerkt, dass de Schorsch joo kaum noch was sehe dut, haben bein Aachedokter geschickt unn der hottem gleich dess Audofahrn verbotte, su long bisser soim graue Star operiert kriecht hätt. No ja, die nächst Woch werrds oone Aache gemacht unn e paar Woche später dess onnern Aache aach, hier in Flerschem werrds gemacht, unn wenn doodenooch e paar Daach erum sinn werrder widder fahrn kenne.

No ja, saach ich, ich habb merr joo aach hier die Aache mache losse, die mache dess gut im Flerschemer Kronkehaus. Awwer saach emol, hosde dess mett dem soine Aache vorher nitt gemerkt?

Säts Kättche: Ei ja. Isch habb misch immer gewunnert: De Schorsch, der immer su arsch sauwer iss, hott uffem Kloo die letzt Zeit immer su Kondensstreife zurück gelosse, du waaßt was ich moon, unn als isch emm gesaat habb, guck emol hie unn mir hawwe e Berrsch unn du waaßt ferr was die iss, doo warer zimmlisch bies, er det immer die Berrsch numme unn det alles sauwer mache unn su ebbes misst isch emm nitt saache. Unn waaßde was, Honnes, der hott dess nimmi geseh, awwer dess hott e Zeitlong gedauert bis ischs gemerkt habb.

Ich habb gegrinst: Kättche, dess kann isch merr gut vorstelle, wie de Schorsch doodruffhie su sauer war, awwer weners halt nitt geseh hott ... No ja, in e paar Woche konnem dess nimmi bassiern. Unn jetzt, Kättche, dusde grad enn Aacheblick hier warte, isch holl merr grad e Zeidung unn dann fahr isch disch hoom, du musst den schwere Korb nitt schleppe.

Isch habb dann e paar Daach später mol de Schorsch besucht unn habbem e bissi die Ängst vor dere Operation genumme, weil, wie gesaat, isch dess mett de Aache schunn hinner mir habb.

Verrzeh Daach später rief mischs Kättche oo unn hott ins Telefon gelacht. Du Honnes, hottse gesaat, de Schorsch will emol bei disch kumme, bisde dehoom? Der will emol mett soim oone operierte Aache mett dir um die Wett gucke. Awwer oons saach isch derr, er werrds derr verzähle: Schunn zwaa Daach nooch soine Operation, wie er mir beim Abtrockene geholfe hott, doo säter: Du Kättche, dess kloone Messer iss awwer nitt sauwer, dess mussde grad noch emol spüle. Ich guck uffs Messer unn saach: Ei dess iss doch sauwer, Schorsch. Doo säter: Du Kättche, jetzt musst du zum Dokter gieh, isch glaab, jetzt misse bei dir die Aache gemacht wern.

ebb_290_552563453_3335682041.doc

Eiern Honnes